

摘藻堂四庫全書薈要

史部

欽定四庫全書薈要卷九千七百十三

史部

直齋書錄解題卷七

宋 陳振孫 撰

傳記類

古列女傳九卷

案此書篇目與文獻通攷異通攷作古列女傳八卷續列女傳一卷載王回序

略云以頌攷之每篇皆十五傳耳則凡無頌者疑皆非向本書不特自陳嬰母為斷也故并錄其目而以頌證之刪為八篇號古列女傳餘十二傳又以時次之別為一篇號續列女傳此本卷數正與王氏所分同而不別出續列女傳之目蓋書則王本而名則仍其舊耳

漢護都水使者光祿大夫劉向子政撰成帝時趙氏

姊弟起微賤踰禮制向以為王教由內及外故採取詩書所載賢妃貞婦興國顯家可法則及嬖孽亂亡者序次為八篇以戒天子其七篇篇十五人為一百五人第八篇為頌義隋唐志及崇文總目皆十五卷蓋以七篇分為上下并頌為十五卷而自陳嬰母以下十六人附入其中或與向同時或在向後者皆好事者所益也王回曾鞏二序辨訂詳矣鞏之言曰後世自學問之士多徇於外物而不安其守其室家既

不見可法故競於邪侈豈獨無相成之道哉士之苟  
於自恣顧利冒恥而不知反己者往往以家自累故  
也故曰身不行道不行於妻子況於南鄉天下之主  
哉愚嘗三復其言而志之向書傳於世鮮矣惟此書  
獨全其稱詩茅苴柏舟大車之類與今說詩者乖異  
蓋齊魯韓之學固不盡與毛氏同也

東觀漢記十卷

漢謁者僕射劉珍校書郎劉騊駼等撰初班固在顯

宗朝嘗撰世祖本紀功臣列傳載記二十八篇至永  
初中珍駒駱等著作東觀撰集漢紀其後盧植蔡邕  
馬日磾等皆嘗補續唐藝文志一百二十七卷

案隋志作

百四十三卷唐志百二十七卷  
原本作百二十卷誤今改正

今所存惟吳漢賈復

耿弇寇恂馮異祭遵及景丹蓋延九人列傳而已其  
卷第凡十二而闕第七八二卷未知果當時之遺否  
也

高士傳十卷

晉徵士安定皇甫謐士安撰序稱自堯至魏咸熙二千四百餘載得九十餘人今自被衣至管寧惟八十七人

黃帝內傳一卷

序云錢鏐遊衡山得之石室劉向校中秘書傳於世誕妄不經方士輩所託也

飛燕外傳一卷

稱漢河東都尉伶玄子于撰自言與楊雄同時而史

無所見或云偽書也然通德擁髻等事文士多用之而禍水滅火一語司馬公載之通鑑矣

西京雜記六卷

晉句漏令丹陽葛洪稚川撰其卷末言洪家有劉子駿書百卷先父傳之歆欲撰漢書雜錄漢事未及而亡試以此記攷校班固所作殆是全取劉書少有異同耳固所不取不過二萬餘言今鈔出為二卷以裨漢書之闕所謂先父者歆之於向也而館閣書目以

為洪父傳之非是唐藝文志亦只二卷今六卷者後  
人分之也按洪博聞深學江左絕倫所著書幾五百  
卷本傳具載其目不聞有此書而向歆父子亦不聞  
其嘗作史傳於世使班固有所因述亦不應全沒不  
著也殆有可疑者豈惟非向歆所傳亦未必洪之作  
也

案晁公武讀書志云此書江  
左人皆以為吳均依託為之

### 襄陽耆舊傳五卷

晉榮陽太守襄陽習鑿金齒彦威撰



談藪二卷

北齊秘書省正字北平陽玠松撰事綜南北時更八代隋開皇中所述也

梁四公記一卷

唐張說撰按館閣書目稱梁載言纂唐志作盧說注云一作梁載言邯鄲書目云載言得之臨淄田通又云別本題張說或為盧說今按此書卷末所云田通事跡信然而首題張說不可曉也其所記多誕妄而

四公名姓尤怪異無稽不足深辨載言上元二年進士也

景龍文館記八卷

案唐書藝文志作十卷

唐修文館學士武甄平一撰中宗初置學士以後館中雜事及諸學士應制倡和篇什雜文之屬亦頗記中宗君臣宴褻無度以及暴崩其後三卷為諸學士傳今闕二卷平一以字行

狄梁公家傳三卷

唐海州刺史江都李邕泰和撰

高力士外傳一卷

唐大理司直郭湜撰

案唐書藝文志作郭湜撰大歷中大理司直原本作鄭湜誤今

改正

北征雜記一卷

唐宰相趙憬撰貞元四年咸安公主下降回紇憬副

關播為冊禮使作此書紀行

唐年小錄八卷

案宋史藝文志作六卷

唐戶部尚書扶風馬總會元撰記唐以來雜事分為  
七門末卷為雜錄舊有一本畧甚復得程文簡本傳  
之始為全書

陵園記一卷

唐宗正丞李

原註失其名

撰光化元年序

鳳池歷二卷

不著名氏記長孫無忌歷官本末及家世子孫按唐  
志馮宇鳳池錄五十卷李淑書目惟存五卷記宰相

名次事跡非此書

鄴侯家傳十卷

唐亳州刺史京兆李繁撰繁宰相泌之子坐事下獄  
知且死恐先人功業泯滅從吏求廢紙拙筆為傳按  
中興書目有柳玘後序今無之繁嘗為通州韓退之  
送諸葛覺詩所謂鄴侯家多書插架三萬軸者也其  
曰行年餘五十出守數已六屢為丞相言雖懇不見  
錄則韓公於繁亦拳拳矣新舊史本傳稱繁無行漏

言裴延齡以誤陽城師事梁肅而烝其室殆非人類  
然則韓公無乃溢美而所述其父事庸可盡信乎

牛羊日厯一卷

唐劉軻撰牛羊指僧孺羊謂虞卿漢公也是不孫甚矣  
西南備邊錄一卷

唐宰相李德裕文饒撰太和中鎮蜀所作內州縣城  
鎮兵食之數大畧具矣

異域歸忠傳二卷

李德裕撰會昌二年嗚沒斯內附德裕奉詔采秦漢  
以來由絕域歸中國以名節自著功業始終者凡三  
十人為之傳

蠻書十卷

唐安南宣慰使樊綽撰記南詔事咸通五年奏之

閩川名士傳一卷

唐崇文館校書郎黃璞所記人物自薛令之而下凡  
五十四人

崔氏日錄一卷

不著名氏殘缺無始末未有跋尾不知何人言此書  
出宋敏求家攷訂年月及所載人名姓甚詳蓋廣明  
元年崔沆為相非其子弟即其門人為之字畫清麗  
而其所記不過痛飲交通評議有以見唐末風俗之  
弊云

開元天寶遺事二卷

案文獻通攷作四卷

五代太子少保天水王仁裕德輦撰所記一百五十



九條

入洛記一卷

王仁裕撰仁裕仕前蜀國亡入洛記行

中朝故事二卷

偽唐給事中尉遲偓撰載唐末雜事

燉煌新錄一卷

有序稱天成四年沙州傳舍集而不著名氏蓋當時奉使者叙張義潮本末及彼土風物甚詳涼武昭王

時有劉昫者著燉煌實錄二十卷故此號新錄

唐末汎聞錄一卷

題常山閻自若撰

案宋史藝文志作高自若

記五代及諸僭偽事

其序自言乾德中得於先人及舅氏聞見且曰傳者  
難驗見者易憑攷之史策不若詢之耆舊也然所記  
亦時有不同者如李濤納命事本謂張彥澤今乃云  
謁周高祖未詳孰是

楊妃外傳一卷

直史館臨川樂史子正撰

渚宮故事五卷

後周太子校書郎余知古撰載荆楚事自鬻熊至唐

末本十卷今止晉代闕後五卷

案唐書藝文志余知古渚宮故事十卷注

唐文宗時人晁公武讀書志亦云唐余古撰脫知字此云後周未知何據

錦里耆舊傳八卷續傳十卷

前應靈縣令平陽句延慶昌裔撰開寶三年秘書丞

劉蔚知榮州得此傳其詞蕪穢請延慶修之改曰成

都理亂記天成之後別加編次起咸通九載迄乾德四年百餘年蜀事大畧具矣續傳蜀人張緒所撰起乾德乙丑迄祥符己酉自平蜀之後朝廷命令官僚姓名及政事因革以至李順王均劉旰作亂之迹皆畧載之知新繁縣太常博士張約為之序

平蜀實錄一卷

左藏庫副使康延澤撰平蜀之役延澤以內染院使為鳳州路馬軍都監王全斌等既得罪延澤亦貶唐

州團練使按本傳載蜀軍二萬七千人諸將慮其為  
全師雄內應欲盡殺之延澤請簡老弱疾病七千人  
釋之餘以兵衛浮江而下諸將不能用此書敘述甚  
詳邯鄲書目云不知作者館閣書目亦然攷王元之  
所撰延澤墓誌知其所為也

秦王貢奉錄二卷

樞密使吳越錢惟演希聖撰記其父倣貢獻及錫賚  
之物

家王故事一卷

錢惟演撰記其父遺事二十二事上之以送史院

戊申英政錄一卷

婺州刺史錢儼撰記其兄倣事迹倣以戊申正月嗣位

玉堂逢辰錄二卷

錢惟演撰其載祥符八年四月榮王宮火一日二夜所焚屋宇二千餘間左藏內藏香藥諸庫及秘閣史

館香聞數十里三館圖籍一時俱盡大風或飄至汴水之南惟演獻禮賢宅以處諸王以此觀之唐末五代書籍之僅存者又厄於此火可為太息也

南部新書十卷

翰林學士錢易希白撰侗之子也所記多唐遺事

唐登科記十五卷

丞相鄱陽洪适景伯編集按唐藝文志有崔氏顯慶登科記五卷姚康科第錄十六卷李奕登科記二卷

崔氏書有趙儋序而失崔名所載至周顯德固非崔氏本書而李奕書亦不存洪忠宣得姚康書五卷於北方而丞相又得別本起武德終太和於毗陵錢氏乃以三本輯為一書而用姚氏為正三書皆有序姚字汝諧南仲孫也元和十五年進士本書錄武德至長慶為十一卷其曰十六卷者亦後人所續

五代登科記一卷

不著名氏前所謂崔氏書至周顯德止者殆即此耶



館中有此書洪丞相以國初卿相多在其中故併傳之

大宋登科記三十二卷

案題解云二十一卷宋史藝文志同此蓋誤作三十二卷

洪适編始吳興郡學有餼板不分卷第止述進士一科适始倣姚康錄制舉詞科自建隆庚申迄紹興庚辰二萬三千六百人有奇為二十一卷自後皆續書之

中興登科小錄三卷姓類一卷

通判徽州江都李椿撰新安舊有登科記但逐榜全錄姓名而已椿家藏小錄自建炎戊申至嘉熙戊戌節取名字鄉貫及三代諱刊之後以韻類其姓凡一萬五千八百人有奇太守吳興倪祖常子武刻之以備前記之闕文

乘軺錄一卷

知制誥祁陽路振子發撰祥符中使契丹歸進此錄奉使別錄一卷

丞相河南富弼彥國撰慶歷使契丹歸為語錄以進  
機宜事節則具於此錄又一本有兩朝往來書附於  
末

劉氏西行錄一卷

直昭文館保塞劉渙仲章撰按康定二年朝廷議遣  
使通河西唃氏渙以屯田郎知晉州請行以十月十  
九日出界慶歷元年三月十日回秦州此其行紀也  
唃氏自此與中國通而元昊始病於牽制矣渙後擢

刺史歷典數州至留後以工部尚書致仕

契丹講和記一卷

不著名氏載契丹初講和本末末有慶歷增幣後北

國誓書

慶歷正旦國信語錄一卷

余靖慶歷三年使遼所記

熙寧正旦國信錄一卷

天章閣待制竇卞熙寧八年使遼所記

接伴送語錄一卷

集賢校理沈季長熙寧九年接伴送遼使耶律運所  
記

使遼見聞錄二卷

尚書膳部郎中李罕撰

奉使雞林志三十卷

宣德郎王雲撰崇寧元年雲以書狀從劉達吳棫使  
高麗歸而為此書以進自元豐創通高麗以後事實

皆詳載之

宣和使金錄一卷

太常少卿安陸連南天鵬舉吊祭阿骨打奉使所記  
時宣和六年

奉使雜錄一卷

紹興十二年何鑄使金所錄禮物名銜表章之屬  
館伴日錄一卷

無名氏紹興二十四年

隆興奉使審議錄一卷

左奉議郎雍希稷堯佐撰隆興二年編修官胡昉閣  
門祇候楊由義使金人軍前審議海泗唐鄧等事不  
屈而歸希稷其禮物官也所記抗辯應對之語多出  
由義

攬轡錄一卷

叅政吳郡范成大至能乾道六年使金所記聞見  
北行目錄一卷

叅政四明樓鑰大防乾道己丑待次温州教授以書  
狀官從其舅汪大猷仲嘉使金紀行

乾道奉使錄一卷

叅政諸暨姚憲令則乾道壬辰使金日記

奉使執禮錄一卷

進士鄭儼撰淳熙己酉中書舍人莆田鄭僑惠叔使  
金賀正會其主雍病篤欲令于閣門進國書僑不可  
已而雍殂遂回



使燕錄一卷

尚書戶部郎龍游余嶸景瞻撰嘉定辛未嶸使金賀  
生辰會有韃寇行至涿州定興縣而回

李公談錄一卷

翰林學士饒陽李宗諤昌武撰記其父昉之言凡三  
十七事

丁晉公談錄一卷

不知何人作

賈公談錄一卷

序言庚午銜命宋都聞於補闕賈黃中凡二十六條而不著其名別本題清輝殿學士張洎蓋洎自江南奉使也庚午實開寶三年黃中晉開運中以七歲為童子關頭

案宋史本傳六歲舉童子科

十六歲進士及第第三人

王沂公筆錄一卷

丞相沂公青社王曾孝先撰記開國以來雜事凡三十六條

沂公言行錄一卷

天章閣待制王暉子融撰沂公之弟也前有葉清臣

案文獻通攷

作李清臣

序文後有晏殊杜杞答書

王文正家錄一卷

端明殿學士王素仲儀記其父旦言行遺事

寇萊公遺事一卷

不知何人作

乖崖政行語錄三卷

案文獻通攷作張忠定公語錄四卷

虞部員外郎成都李旼撰述張忠定公詠治蜀政事  
及言行

安定先生言行錄二卷

雜錄胡瑗翼之事及告詞誌表祭文等其間有賢惠  
錄孝行錄蓋其父訥所為也孝行錄別見賢惠錄記  
婦人之賢者

曹武惠別傳一卷

知石州曹偃撰武惠曾孫也

韓魏公家傳十卷

案文獻通攷作二卷

不著名氏當是其家所傳也

案晁公武讀書志稱韓忠彥撰錄其父琦平生

行

韓忠獻遺事一卷

郡牧判官錢塘強至幾聖撰至魏公之客也

魏公語錄一卷

與別錄小異而實同別錄分四卷此總為一編先後次第亦不同而末一則別錄所無姑並存之

魏公別錄四卷

樞密大名王巖叟彥霖撰亦魏公客

杜祁公語錄一卷

不知何人作

文潞公私記一卷

記至和請建儲及元豐褒賞事

唐質肅遺事一卷

無名氏所記唐介子方事也

韓莊敏遺事一卷

秘書丞韓宗武文若撰記其父丞相鎮玉汝事末亦雜記他事宗武即少年遇洋客者也年八十二乃卒此編亦載其詩云熙寧間得異疾與神物遇

范忠宣言行錄二十卷

不著姓名其家所錄也

范太史遺事一卷

翰林學士范沖元長記其父事

傅獻簡佳話一卷

不知何人作記傅堯俞所談

杜公談錄一卷

雷澤杜師益等錄其父務滋之言王廣淵作序

道鄉語錄一卷

不知作者記鄒浩志完語

豐清敏遺事一卷

給事中章貢李朴先之撰記豐稷相之事朱熹為之



後序

宗忠簡遺事三卷

不著名氏錄留守開封宗澤汝霖事亦其家子孫所為也

呂忠穆家傳一卷逢辰記一卷遺事一卷

記建炎丞相呂頤浩元直事孫昭問刻之廣德軍

褒德集二卷易學辨惑一卷

邵伯溫撰錄其父誥命謚議行狀墓誌之屬辨惑述

傳授源流辨鄭夬之妄

呂氏家塾記一卷

侍講呂希哲原明撰

桐陰舊話十卷

吏部尚書潁川韓元吉无咎撰記其家世舊事以京師第門有桐木故云元吉門下侍郎維之四世孫也  
熙寧日錄四十卷

丞相王安石撰本朝禍亂萌於此書陳瓘所謂尊私

史而壓宗廟者其彊愎堅辯足以熒惑主聽鉗制人言當其垂死欲秉畀炎火豈非其心亦有所愧悔歟既不克焚流毒遺禍至今為梗悲夫書本有八十卷今止有其半

溫公日記一卷

司馬光熙寧在朝所記凡朝廷政事臣僚差除及前後奏對上所宣諭之語以及聞見雜事皆記之起熙寧元年正月至三年十月出知永興軍而止

趙康靖日記一卷

叅政睢陽趙槩叔平所記治平乙巳丙午間在政府事

劉忠肅行年記一卷

丞相東平劉摯莘老撰

紹聖甲戌日錄一卷元符庚辰日錄一卷

丞相南豐曾布子宣撰記在政府奏對施行及宮禁

朝廷

文昌雜錄六卷

主客郎中南京龐元英懋賢撰官制初行元英為郎  
在省四年記一時見聞及古今典故可觀覽元英丞  
相莊敏公籍之子

聞見近錄一卷

宗正丞三槐王鞏定國撰

辨欺錄一卷

韓忠彥記其父嘉祐末命事與文富諸公辨

回天錄一卷

宣教郎秦湛處度撰記呂好問圍城中事好問除右丞誥詞有回天之力語故以名錄後有好問謝其祖公著復官表及遺表

盡忠補過錄一卷

修職郎穆伯芻撰記張孝純在偽齊時所上本朝書

吳丞相手錄一卷

吳敏元忠撰記靖康初元事

岳飛事實六卷辨誣五卷

飛之孫珂撰

丁卯實編一卷

成忠郎李珙撰誅曦之功楊巨源為多安丙忌而殺之珙為作傳上之於朝以昭其功而伸其冤

孔子編年五卷

新安胡仔元任撰其父待制舜陟命仔采摭經傳為之

諸葛武侯傳一卷

侍講張栻撰以陳壽作史私且陋裒集他傳及裴松之所注為此傳而削去管樂自許一則朱晦翁以為不然又為後論以達其意謂其體正大而學未至使得游洙泗之門所就不止此

韓文公歷官記一卷

新安張敦頤撰頗疏畧其最誤者序言擒吳元濟出牛元翼為一事此大謬也為裴度行軍司馬在憲宗



元和時奉使鎮州王庭湊在穆宗長慶時

歐公本末四卷

呂祖謙編蓋因觀歐陽公集考其歷仕歲月同官同朝之人畧著其事迹而集中詩文亦隨時附見非獨歐公本末而時事時賢之本末亦大略可觀矣故以入傳記類

皇祐平蠻記二卷

殿中丞馮炳撰記儂智高事

孫威敏征南錄一卷

學士睢陽滕甫元發撰言平南之功皆本孫沔元規  
狄青之至莫能出其右者余靖歸美於青非實也甫  
時通判潮州

唵廝囉傳一卷

不著作者

陝西聚米圖經五卷

閣門通事舍人雄州趙珣撰珣父振博州防禦使久

在西邊珣訪得五路徼外山川道里康定二年為此  
書韓魏公經略言於朝詔取其書召見執政呂許公  
宋莒公言用兵以來策士之言以千數無如珣者擢  
涇原都監定川之敗死焉珣勁特好學恂恂類儒者  
人皆惜之

元豐平蠻錄三卷

金部員外郎知鳳翔府家安國撰記乞弟韓存寶事  
元祐分疆錄三卷

直龍圖閣京兆游師雄景叔撰元祐初議棄西邊四

寨執政召師雄問之對曰先帝棄之可也主上棄之

則不可且示弱夷狄反益邊患爭之甚力不聽卒棄

之四寨者葭蘆米脂浮屠安疆也

案宋史作米脂原本作乘脂今改正

夏人以事出望外萌侵侮之心連年犯順皆如師雄

所料此書前三卷記當時論辨本末後一卷行實不

知何人作也是歲師雄被命行邊請以便宜行事夏

人與鬼章謀寇熙河師雄說劉舜卿出師种誼遂破

洮州擒鬼章以獻其功偉矣元祐諸老固欲休兵息民師雄言既不行功復不賞殆以專反熙豐失於偏滯終成紹述之禍亦有以也師雄治平二年進士

青唐錄一卷

右班殿直李遠撰元符中取邈川青唐已而皆棄之遠紹聖武舉人官鎮洮奉檄軍前記其經歷見聞之實粲然可觀

交趾事迹十卷

知新州趙勰撰

占城國錄一卷

不著名氏

雞林類事三卷

不著名氏

政和大理入貢錄一卷

右迪功郎錢塘周邦撰其祖種為集賢修撰知桂州  
時歸明人黃璘招來大理國入貢詔種考究其真偽

種言偽妄不可憑乞依熙寧故事支馬價發還璘至  
京師力主其事種落職奉祠久而覺其詐乃改正復  
職知廣州

安南表狀一卷

紹興二十五年李天祚進貢自靖康二年以後至是  
始通也

邊和錄五卷

承議郎河東陳伯疆撰載胡世將承公宣撫川陝事

建炎德安守禦錄三卷

郡丞東平劉荀子卿編次建炎初高密陳規元則守德安禦羣盜事迹功狀規後守順昌與劉錡共成卻敵之功者也以樞密直學士知廬州而卒

淮西從軍記一卷

不著名氏記紹興十年金人敗盟淮西諸帥守禦事順昌破敵錄一卷

不著名氏記劉錡信叔守禦戰勝本末



滕公守台錄一卷

不著名氏睢陽滕膺子勤為台州戶曹方臘之亂仙  
居人呂師囊應之攻城甚急膺佐太守備禦卒全一  
城郡人德之至今廟食行狀事實聚見此編膺後至  
直秘閣京西漕而終

二楊歸朝錄一卷

楊堯弼楊載紹興八年所與達賚烏珠書時偽齊初  
廢也末有探報金事數十條

逆臣劉豫傳一卷

楊堯弼等撰二楊事迹嘗攷前錄題銜稱宣義郎迪  
功郎並為大總管府官屬此傳堯弼為右從事郎載  
為右迪功郎

許右丞行狀一卷

吏部員外郎許忻撰許公翰字崧老襄邑人為尚書  
右丞忻其弟也

李忠定行狀一卷

通判洪州李綸撰其兄丞相綱伯紀事狀葉適正則所作謚議附於後

翟忠惠家傳一卷

翟耆年伯壽述其父汝文公異事實忠惠者私謚也耆年實邢恕外孫

艾軒家傳一卷

莆田林成季述其季父工部侍郎光朝謙之事實

夾漈家傳一卷所著書目附

莆田鄭翁歸述其父樵漁仲事跡樵死時翁歸年八  
歲安貧不競頃佐莆郡時猶識之

葉丞相行狀一卷

閣學廬陵楊萬里廷秀撰丞相莆田葉顥子昂乾道  
丁亥冬雷罷相至建寧而薨

謝修撰行狀墓誌一卷

昭武謝師稷務本奉使閩部有惠愛沒而民祠之行

狀里人黃適景聲撰

案文獻通攷黃適作黃適

墓誌永嘉陳謙益

之撰其廟曰昭應

朱侍講行狀一卷

奉議郎三山黃幹直卿撰其高第弟子且子壻也

紫陽年譜三卷

朱侍講門人通判辰州昭武李方子公晦撰

篤行事實一卷

丞相趙汝愚子直編其父善應彥遠事狀而羅願朱熹所撰行狀墓銘及諸賢哀詞題跋之屬萃為一編

篤行者陳福公題其墓云爾呂太史跋語有云處者  
易持出者難工朱侍講取其意以為銘所以勉其子  
之意深矣

趙丞相行實一卷附錄二卷

知靜江府趙崇憲履常編集忠定長子也其一時諸  
賢祭文輓歌與嘉定更化之後昭雪誣枉改正史牒  
本末皆見附錄

趙忠定行狀一卷謚議一卷

知光州鄱陽柴中行與之撰其謚議劉允濟全之楊方子直所為也

倪文節言行錄三卷遺奏誌狀碑銘謚議一卷

戶部郎中倪祖常子武輯其父尚書遺事行狀錫山蔣重珍良貴撰碑銘臨邛魏了翁華甫撰

趙華文行狀一卷

文林郎趙山李燾敬子撰忠定之子吏部崇憲履常也

八朝名臣言行錄二十四卷

侍講朱熹撰以近代文集及傳記所載本朝名臣言行掇取其要輯為此錄前五朝五十五人後三朝四十二人

中興忠義錄三卷

龔頤正撰自建炎至紹興辛巳上自李若水劉韜貴臣名士下及一婦人卒伍之微皆錄之

孝史五十卷



太學博士新喻謝諤昌國撰集曰君紀五后德一宗  
表五臣傳三十五文類二夷附一諤後至御史中丞  
淳熙名臣樂易君子也

孝行錄三卷

京兆胡訥撰始得此書不知訥何人也所記多國初  
人已而知其為安定先生翼之之父仕為寧海節度  
推官

古今孝悌錄二十四卷

廬陵王紹珪唐卿撰

廉吏傳十卷

成都費樞伯樞撰自春秋至唐凡百十有四人宣和

乙巳為序

南陽先民傳二十卷

題南陽王襄元祐癸酉歲序所記鄧州人物自百里  
奚直不疑而下至唐范傳正韓雄凡一百六十人

典刑錄十二卷

苔溪吳宏編凡五十二門大畧於言行錄中鈔出

近世厚德錄四卷

題百鍊真隱李元綱國紀編沈濬道原為作序

救荒活民書三卷

從政郎鄱陽董煗編進煗紹熙五年進士嘗知瑞安

縣

仁和活民書二卷

案文獻通攷  
仁和作仁政

秀州司戶會稽丁銳集

折獄龜鑑三卷

案文獻通攷作決獄龜鑑二十卷

承直郎開封鄭克武子撰初五代宰相和凝有疑獄集其子水部郎和濛續為三卷六十七條克因和氏之書分為二十門推廣之凡二百七十六條三百九十五事起鄭子產迄於本朝

明刑盡心錄二卷

丁銳為鄂州司理又集此書

好還集一卷

秀水婁伯高元龍編報應之事為十門

先賢施仁濟世錄一卷

奉化丞山陰諸葛興編凡十門皆本朝諸賢事實也  
莆陽人物志三卷

知興化軍永嘉林紘文伯撰以圖志不叙人物故特  
為是編莆壤地褊小而人物特盛

卧遊錄一卷

呂祖謙撰晚歲病廢卧家取史傳所載古今人境勝

處錄之而以宗少文卧遊之語寘諸卷首

上庠錄十卷

光州助教呂榮義撰雜記京師太學故事

上庠後錄十二卷

三山周士貴撰記中興太學事頗疏畧

昭明太子事實二卷

知池州趙彥博富文編昭明廟食於池頗著靈響晉元

祐始賜額曰文孝

案元祐賜額曰文孝原本誤作文序今改正

祠山家世編年一卷

唐仁澤曾樵編輯廣德橫山神張王事跡

海神靈應錄一卷

永嘉貢士陸維則撰太守韓彥直子溫為之序初元祐中太守直龍圖閣范岫夢海神曰吾唐李德裕也郡城東北隅海仙壇之上有廟初不知其為何代人岫明日往謁其像即夢中所見自是多響應然封爵訓詞惟曰海神而已

鄂國金陀粹編二十八卷續編三十卷

岳珂撰

法令類

律文十二卷音義一卷

自魏李悝漢蕭何以來更三國六朝隋唐因革損益  
備矣本朝天聖中孫奭等始撰音義自名例至斷獄  
歷代異名皆著之

唐令三十卷式二十卷



唐開元中宋璟蘇頲盧從愿等所刪定攷藝文志卷  
數同更同光天福校定至本朝淳化中右贊善大夫  
潘憲著作郎王洙校勘其篇目條例頗與今見行令  
式有不同者

刑統三十卷

判大理寺燕山竇儀可象詳定初范質既相周建議  
律條繁廣輕重無據特詔詳定號大周刑統凡二十  
一卷至是重加詳定建隆四年頒行

紹興刑統申明一卷

開寶以來累朝訂正與刑統並行者

嘉祐驛令三卷

三司使梁國張方平安道等修定前一卷為條貫勅  
後二卷為則例令官吏幫支驛券衙官僉從之類皆  
據此也

慶元勅十二卷令五十卷格三十卷式三十卷目錄一  
百二十二卷隨勅申明十二卷總二百五十六卷

丞相豫章京鏜仲遠等慶元四年表上國朝自建隆以來世有編勅每更修定號為新書中興至此凡三修矣其有續降指揮謂之後勅以待他時修入云

紹興貢舉法五十卷

丞相万俟卨等紹興二十六年表上

紹興監學法二十六卷目錄二十五卷申明七卷對修釐正條法四卷共六十二卷

宰相秦檜等紹興十三年表上

嘉泰條法事類八十卷

宰相天台謝深甫子肅等嘉泰二年表上初吏部七司有條法總類淳熙新書既成孝宗詔倣七司體分門修纂別為一書以事類為名至是以慶元新書修定頒降此書便於檢閱引用惜乎不併及刑統也

嘉定吏部條法總類五十卷

嘉定中以開禧重修七司法并慶元海行法在京通用法大宗正司法參定凡改正四百六十餘條視淳

熙總類增多十卷七年二月頒行

役法撮要一百八十九卷

提舉編修宰相京鏜等慶元六年上自紹興十七年正月以後至慶元五年七月以前為五十五門又八十二小門門為一卷外為參詳目錄等卷雖多而文甚少其書於州縣差役極便於引用

刑名斷例十卷

不著名氏以刑統勅令總為一書惜有未備也

營造法式三十四卷看詳一卷

將作少監李誠編修初熙寧中始詔修定至元祐六年成書紹聖四年命誠重修元符三年上崇寧二年頒印前二卷為總釋其後曰制度曰功限曰料例曰圖樣而壕寨石作大小木雕鏤鋸作泥瓦彩畫刷飾又各分類匠事備矣

修城法式條約二卷

判軍器監沈括知監丞呂和卿等所修敵樓馬面團

敵式樣并申明條約熙寧八年上

宣和軍馬司勅十三卷令一卷

宣和所修

金料類要二卷


案宋史藝文志作一卷

不著名氏

元豐刑部叙法通用一卷

末載申明至紹興淳熙以後

直齋書錄解題卷七



總校官庶吉士臣侍朝

校對官編修臣莫瞻錄

謄錄監生臣周翥華



欽定四庫全書薈要

史部

直齋書錄解題卷八



詳校官員外郎臣潘紹觀

欽定四庫全書薈要卷九千七百十四

史部

直齋書錄解題卷八

宋 陳振孫 撰

譜牒類

姓源韻譜一卷

唐張九齡撰依春秋正典柳氏萬姓錄世本圖摭

諸書纂為此譜分四聲以便尋閱古者賜姓別之黃  
帝之子得姓者十四人是也後世賜姓合之漢高帝  
命婁敬項伯為劉氏是也惟其別之也則離析故古

金史四庫全書卷八  
者論姓氏推其本同惟其合之也則亂故後世論姓氏識其本異自五胡亂華百宗蕩析夷夏之裔與夫冠冕輿臺之子孫混為一區不可遽知此周齊以來譜牒之學所以貴於世也歟

元和姓纂十卷

唐太常博士三原林寶撰元和中朔方別帥天水閻某者封邑太原以為言上謂宰相李吉甫曰有司之誤不可再也宜使儒生條其源系考其郡望子孫職

任並總緝之每加爵邑則令閱視吉甫以命寶二十  
旬而成此書絕無善本頃在莆田以數本參校僅得  
七八後又得蜀本校之互有得失然粗完整矣

李氏皇室維城錄一卷

屯田郎中李衢沔王長史林贊修止於僖宗蓋昭宗  
時所錄也

李氏房從譜一卷

唐洛陽主簿李匡文撰時為圖譜官

聖唐偕日譜一卷

前賀州刺史李匡文撰序言前守職圖籍日撰天潢源派譜統務在省畧直取相承一葉旁附首分諸房今特從聖唐以來列聖下諸王公主逐帝書出號曰偕日與日齊行之義也匡文字濟翁又有資暇集見於錄

唐宰相甲族一卷

唐韋述蕭穎士等撰自王方慶而下十有四家

唐相門甲族諸郡氏譜共一卷

不著名氏甲族八十六家氏譜自京兆八姓而下凡  
三百五十姓

唐杜氏家譜一卷

唐太子賓客杜信撰

天下郡望氏族譜一卷

唐李林甫等天寶八年所纂並附五音於後

姓苑二卷

不著名氏古有何承天姓苑今此以李為卷首當是  
唐人所為

姓解三卷

鴈門邵思撰以偏旁字類為一百七十門二千五百  
六十八氏景祐二年序

千姓編一卷

不著名氏末云嘉祐八年采真子記以姓苑姓源等  
書撮取千姓以四字為句每字為一姓題曰千姓編

三字亦三姓也逐句文義亦頗相屬殆千字文之比云

陳郡袁氏譜一卷

袁陟世弼錄

陶氏家譜一卷

懷州教授陶直夫錄侃之後也

帝王系譜一卷

武夷吳達

案文獻通攷作吳達

公路撰政和壬辰也自漢迄周



顯德每代畧具數語其論曹操迫脅君后無復臣禮  
逆節已顯會其病死故纂竊之惡漏在身後昔人謂  
其不敢危漢者亦不覈其情耳此論與愚意脗合

羣史姓纂韻譜六卷

案文獻通攷作羣史姓纂韻譜原本誤作羣史今改正

永福黃邦先宋顯撰凡史傳所有姓氏皆有韻類聚  
而著其所出建炎元年其兄邦俊宋英為之序

古今姓氏書辨證四十卷

校書郎史館校勘臨川鄧名世元亞撰其子椿年緒

成之

皇朝百族譜四卷

長沙丁維臯撰周益公為之序時紹興末也僅得百二十有三家其闕遺尚多未有能續裒集者

米氏譜一卷

奉直大夫米憲錄蓋國初勲臣米信之後信五世為  
帝元章又三世為憲

目錄類

唐藝文志四卷

新唐書中錄出別行監中有印本

崇文總目一卷

景祐初學士王堯臣同聶冠卿郭績

案文獻通攷作煥

呂公

綽王洙歐陽修等撰定凡六十六卷諸儒皆有論議  
歐公文集頗見數條今此惟六十六卷之目耳題云

紹興改定

案晁公武讀書志是書刊正訛謬條次之凡四十六類計三萬六百六十九卷通考

作總目六十四卷此云一卷者或因鄭漁仲之言以排比諸儒每書之下必出新意著說嫌其繁蕪無用

故紹興中從而去其  
序釋僅存其目也

秘書省四庫闕書目一卷

亦紹興改定其闕者注闕字於逐書之下

邯鄲書目十卷

學士河南李淑獻臣撰號圖書十志皇祐己丑自作  
序以示子孫曰朋圭芻者其子壽朋復圭德芻也

京兆金石錄六卷

北平田概纂元豐五年王欽臣為序自為後序皆記

京兆府縣古碑所在覽之使人慨然

集古錄跋尾十卷

歐陽修撰編述之意序文詳之世所共知不復著

集古目錄二十卷

公子禮部郎官棐叔弼撰公既為跋尾二百九十六

篇命棐撮其大要別為目錄棐之序云爾今考集中

凡三百五十餘跋

案以上三條文獻通考引陳氏之言原本俱脫去今補入

太宗御製御書目一卷

玉宸殿所藏兼有真宗御製序十四篇又本稍多而無序文

真宗御製碑頌石本目錄一卷

凡九十名件乾興所刊板

龍圖閣瑞物寶目六閣書籍圖畫目共一卷

玉宸殿書數附

已上平江虎丘寺御書閣有原頌降印本傳寫得之

羣書備檢三卷

案文獻通考作十卷

不知名氏皆經史子集目錄

廣川藏書志二十六卷

徽猷閣待制董道彥遠撰以其家藏書考其本末而為之論說及於諸子而止蓋其本意專為經設也

廣川書跋十卷畫跋五卷

董道撰

寶墨待訪錄二卷

禮部員外郎米芾元章撰記承平時故家所藏晉唐遺跡

金石錄三十卷

東武趙明誠德甫撰其所藏二千卷蓋倣歐陽集古而數則倍之本朝諸家蓄古器物款式其考訂詳洽如劉原父呂與叔黃長睿多矣大抵好附會古人名字如丁字即以為祖丁舉字即以為伍舉方鼎即以為子產仲吉匜即以為偏姑之類邃古以來人之生世夥矣而僅見於簡冊者幾何器物之用於人亦夥矣而僅存於今世者幾何迺以其姓字名物之偶同



而實焉余嘗竊笑之惟其附會之過併與其詳洽者皆不足取信矣惟此書跋尾獨不然好古之通人也明誠宰相挺之之子其妻易安居士李氏為作後序頗可觀

案此條文獻通考引陳氏之言原本誤脫今補入

考古圖十卷

汲郡呂大臨與叔撰其書作於元祐七年所紀目御府之外凡三十六家所藏古器物皆圖而錄之

博古圖說十一卷

祕書郎邵武黃伯思長睿撰有序凡諸器五十九品其數五百二十七印章十七品其數二百四十五案李丞相伯紀為長睿志墓言所著古器說四百二十六篇悉載博古圖今以圖說考之固多出於伯思亦有不盡然者又其名物亦頗不同錢鑑二品至多此所載二錢二鑑而已博古不載印章而此印章最夥蓋長睿沒於政和八年其後修博古圖頗採用之而亦有所刪改云爾其書大抵好傳古人名字說已見

前

宣和博古圖三十卷

宣和殿所藏古器物圖其形製而記其名物錄其款識品有總說以舉其凡而物物考訂則其目詳焉然亦不無牽合也

羣書會記二十六卷

案文獻通考作三十六卷

鄭樵撰大畧記世間所有之書非必其家皆有之也

夾漈書目一卷圖書志一卷

鄭樵記其平生所自著之書志者蓋述其著作之意也

秦氏書目一卷

濡須秦氏元祐二年有為金部員外郎者聞於朝請以宅舍及文籍不許子孫分割

藏六堂書目一卷

莆田李氏云唐江王之後有家藏誥命其藏書自承平時今浸以散逸矣

吳氏書目一卷

奉議郎漳浦吳與可權家藏閩中不經兵火故家文籍多完具然地濕苦蠹損

晁氏讀書志二十卷

案宋史藝文志作四卷

昭德晁公武子止撰其序言得南陽公書五十篋合其家舊藏得二萬四千五百卷其守榮州日夕讎校每終篇輒論其大指時紹興二十一年也其所發明有足觀者南陽公未知何人或云井度憲孟也

案井度文

獻通考

作并度

遂初堂書目一卷

錫山尤氏尚書衰延之淳熙名臣藏書至多法書尤富嘗燼於火今其存亡幾矣

中興館閣書目三十卷

祕書監臨海陳騏叔進等撰淳熙五年上之中興以來庶事草創網羅遺逸中祕所藏視前世獨無歎焉殆且過之大凡著錄四萬四千四百八十六卷蓋亦

盛矣其間考究疏謬亦不免焉

館閣續書目三十卷

祕書丞吳郡張攀從龍等撰嘉定十三年上以淳熙  
後所得書纂續前錄草率尤甚凡一萬四千九百四  
十三卷

隸釋一十七卷隸續二十一卷

丞相鄱陽洪适景伯撰凡漢刻之存於世者以今文  
寫之而為之釋又為之世代譜及物象圖碑形式悉

具之魏初近古者亦附焉年來北方舊刻不可復得  
覽此猶可慨想

法寶標目十卷

戶部尚書三槐王右敏仲撰以釋藏諸函隨其次第  
為之目錄而釋其因緣凡佛會之先後華譯之異同  
皆具著之右旦之曾孫入元祐黨籍

鄭氏書目七卷

莆田鄭寅子敬以所藏書為七錄曰經曰史曰子曰



藝曰方技曰文曰類寅知樞密院僑之子博文彊記多識典故端平初召為都司執法守正出為漳州以沒

集古系時錄十卷系地錄十一卷

鄭樵撰大抵因集古之舊詳考其時與地而系之二

書相為表裏

案此條文獻通考引陳氏之言原本脫今補入

寶刻叢編二十卷

臨安書肆陳思者以諸家集古書錄用九域志京府

州縣繫其名物而昔人辨證審定之語具著其下其  
不詳所在附末卷

釋書品次錄一卷

題唐僧從梵集末有黎陽張翬跋稱大定丁未蓋北  
方板本也

地理類

山海經十八卷

漢侍中奉車都尉臣秀所校祕書秀即劉歆也晉郭

璞注案唐志二十三卷音二卷今本錫山尤袤延之  
校定世傳禹益所作其事見吳越春秋曰禹東巡登  
南岳得金簡玉字通水之理遂行四瀆與益共謀所  
至使益疏而記之名山海經此其為說恢誕不典司  
馬遷曰言九州山川尚書近之矣至禹本紀山海經  
所書怪物余不敢言之也可謂名言孰曰多愛乎故  
尤跋明其為非禹伯翳所作而以為先秦古書無疑  
然莫能名其為何人也洪慶善補注楚辭引山海經

淮南子以釋天問而朱晦翁則曰古今說天問者皆  
本此二書今以文意考之疑此二書本皆緣解天問  
而作可以破千載之惑古今相傳既久姑以冠地理  
書之錄

水經三卷水經注四十卷

桑欽撰後魏御史中尉范陽酈道元善長注桑欽不  
知何人卽鄆書目以為漢人晁公武曰成帝時人當  
有所據案唐志注或云郭璞撰又杜氏通典案水經

晉郭璞注二卷後魏酈道元注四十卷皆不詳所撰者名氏亦不知何代之書佑謂二子博瞻解釋固應精當然其經云濟水過壽張則前漢壽良縣光武更名又東北過臨濟則前漢狄縣安帝更名又云潁水過湖陸則前漢湖陵縣章帝更名又云汾水過河東郡永安則前漢彘縣順帝更名故知順帝以後纂序也詳水經所作殊為詭誕全無憑據案後漢郡國志濟水王莽末因旱渠塞不復截河南過統順帝時所

撰都不詳悉其餘可知景純注解又甚疎略亦為迂怪以其僻書人多不覩謂其審正未之精也

案成帝時人以

下原本俱脫漏今據文獻通考所引陳氏之言補入

### 唐十道圖一卷

唐宰相趙郡李吉甫宏憲撰首載州縣總數文武官員數俸料唐志云十卷今不分卷

### 元和郡縣志四十卷

案新唐書藝文志李吉甫元和郡縣圖誌五十四卷

李吉甫撰自京兆至隴右凡四十七鎮篇首有圖今

不存

唐十道四蕃志十卷

案文獻通考作十三卷

唐太府少卿梁載言撰其書廣記備言頗可觀載言  
不見於史又有具員故事題鳳閣舍人及梁四公記  
亦云載言所錄

太平寰宇記二百卷

太常博士直史館宜黃樂史子正撰起自河南周於  
海外當太宗朝上之

元豐九域志十卷

知制誥丹陽王存正仲集賢校理南豐曾肇子開官  
制所檢討卽鄆李德芻等刪定總二十三路四京十  
府二百四十二州三十七軍四監一千一百三十五  
縣

輿地廣記三十八卷

廬陵歐陽忞撰政和中作其前三卷以今之郡縣系  
於前代郡國之下其序曰以今州縣求於漢則為郡



以漢郡縣求於三代則為州三代之九州散而為漢之六十餘郡又分而為今之三百餘州雖或離或合不可討究而吾胸中則已了然矣漢郡國一百三今云六十餘郡不可曉也志為文忠族孫行名皆連心字

地理指掌圖一卷

蜀人稅安禮撰元符中欲上之朝未及而卒書肆所刊皆不著名氏亦頗闕不備此蜀本有涪右任慥序

言之頗詳

歷代疆域志十卷

臨川布衣吳澥撰

輿地紀勝二百卷

知江寧縣金華王象之撰蓋以諸郡圖經節其要略而山川景物碑刻詩詠初無所遺行在宮闕官寺實冠其首闕河版圖之未復者猶不與焉眉山李說齋季允為之序

輿地圖十六卷

王象之撰紀勝逐州為卷圖逐路為卷其搜求亦勤矣至西蜀諸郡尤詳其兄觀之漕夔門時所得也

皇朝方域志二百卷

東陽布衣王希先撰凡前代謂之譜十六譜為八十卷本朝謂之志為一百二十卷譜叙當時事實而注以今之郡縣志述今日疆理而系於古之州國古今參考譜志互見地理學之詳明者無以過此矣嘉熙

二年上于朝得永免文解其父珙本建寧人已未進士試詞科不中頗該洽希先述其遺藁以成此書

東京記三卷

龍圖閣直學士宋敏求次道撰上卷為宮城周五里唐時宣武節度使治所建隆三年廣城之北隅用洛陽宮殿之制修之中卷為舊城周二十一里一百五十步唐汴州城也號闕城亦曰裏城下卷為新城周四十八里二百三十三步周世宗所築羅城也號曰

國城又曰外城三城之內宮殿官府坊巷第宅寺觀  
營房次第記之

河南志二十卷

宋敏求撰司馬溫公序之時元豐六年次道歿矣

長安志二十卷

宋敏求撰趙彥若元考為之序二書凡例微不同然  
漢唐舊都遺事詳矣

關中記一卷

晉葛洪推川撰所載殊簡略

三輔黃圖二卷

不著名氏案唐志一卷今分上下卷載秦漢間宮室  
苑囿甚詳多引用應劭漢書解而如淳顏師古復引  
此書為據意漢魏間人所作然中興書目以為崇文  
總目及國史志不載疑非本書也程氏雍錄辨之尤  
悉

長安圖記一卷

案呂大防著長安圖記此  
本作長安國記誤今改正

丞相汲公呂大防知永興軍以為正長安故圖著其說於上今信安郡有此圖而別錄其說為一編

洛陽伽藍記五卷

後魏撫軍司馬楊街之撰專記洛陽城內外寺院爾朱之亂城郭丘墟追述斯記

洛陽名園記一卷

禮部員外郎濟南李格非文叔撰記開國以來卿公家園圃之盛其末言天下治亂之候在洛陽之盛衰

洛陽盛衰之候在名園之興廢使人感慨格非以不肯與編元祐章奏入黨籍國史文苑有傳世所謂易安居士清照者其女也格非苦心為文而集不傳館中亦無有惟錫山尤氏有之文鑑僅存此跋蓋亦未嘗見其全集也

鄴中記一卷

案唐書藝文志有陸翹  
鄴中記二卷疑即是書

不著名氏記自魏而下及僭偽都鄴者六家宮殿事迹案唐志有鄴都故事二卷肅代時馬溫所作今書



多引之

晉陽事跡雜記十卷

唐河東節度使李璋纂序言四十卷唐志亦同今刪  
為十卷蓋治平中太原府所刻本也從莆田李氏借  
錄自南渡以來關河阻絕圖志泯亡得見一二僅存  
者猶足以發傷今思古之歎然唐并州治晉陽太原  
二縣國初克復徙治陽曲而墟其故二縣後皆併省  
則唐之故跡皆不復存矣

燕吳行役記二卷

不著名氏大中九年崔鉉鎮淮南諸鎮畢賀為此記者燕帥所遣僚佐道中紀所經行郡縣道里及事迹也其曰我府張公者時張允中方帥燕也唐志稱張氏宣宗時人失其名張者其帥之姓爾未審何以知使者之亦為張氏也

臨安志十五卷

府帥吳興周淙彥廣撰首卷為行在所於宮闕殿閣

全不記載籍曰禁省嚴秘不敢明著其視宋次道東京記何其大不侔其他沿革亦多疏略然淙有才具其尹京開湖濬河皆有成緒今城中河道通利民戶為脚船以濟行旅者蓋自此始

吳興統記十卷

攝湖州長史左文質撰分門別類古事頗詳序稱甲辰歲者本朝景德元年也

吳興志二十卷

樞密院編修郡人談鑰元時撰

案文獻通考作談鑰撰原本誤作論今改

正嘉泰元年也其為書草率未得為盡善

### 蘇州圖經六卷

翰林學士饒陽李宗諤昌武等撰景德四年詔以四方郡縣所上圖經刊修校定為一千五百六十六卷以大中祥符四年頒下今皆散亡館中僅存九十八卷余家所有惟蘇越黃三州刻本耳

### 吳郡圖經續記三卷

秘書省正字郡人朱長文伯原撰記祥符以後事亦頗補前志之闕遺長文吳中名士病廢不仕自號樂圃卒於元符元年

吳地記一卷

唐陸廣微撰郡人也多記古吳國事唐未有秀州天禧中始割嘉興縣置故此記合二郡為一

吳郡志五十卷

參政郡人范成大至能撰書始成未行而石湖沒有

求附見某事而弗得者譁曰此非石湖筆也太守不能決藏其書學官然周益公為范墓碑述所著書目有焉及紹定初桐川李壽朋儔老為守始取而刻之而書止於紹熙案文獻通考作其書止於紹興其後事實俾寮屬用褚少孫史記例補成之趙南塘履常作序訂其為石湖書不疑且謂郡士龔頤正案宋史藝文志作龔頤正此本誤作順正今改

正滕宥周南皆嘗薦所聞於公者而龔尤多

# 鎮江志三十卷

教授天台盧憲子章撰

新定志八卷

郡守東平董弇令升撰紹興己未也淳熙甲辰武義

陳公亮重修

嘉禾志五卷故事一卷

郡守毗陵張元成撰為書極草草

毗陵志十二卷

教授三山鄒補之撰

越州圖經九卷

李宗諤祥符所上也末有秘閣校理李垂邵煥修

案宋

史藝文志作邵煥修此本作撰修誤今改正

及覆修名銜然則書成於衆

手而宗諤特提總其凡耳

會稽志二十卷

通判吳興施宿武子郡人馮景中陸子虛朱鼎王度等撰陸放翁為之序首稱禹會諸侯而以思陵巡狩陞府配之氣壯文雅蓋奇作也嘉泰辛酉陸年已七



十七矣未幾始落致仕為史官至八十五歲乃終其筆力老而不衰於此序見之

會稽續志八卷

梁國張渙撰續記辛酉後事而亦補前志之遺前志無進士題名此其尤不可遺者也

赤城志四十卷

國子司業郡人陳耆卿壽老撰其前為圖十有三

赤城續志八卷

郡人吳子良拾其所遺續載之

赤城三志四卷

郡人林表民逢吉撰紹定己丑水壞城修治興築本末詳焉

四明志二十一卷

贛州錄事參軍廬陵羅璿修時胡桀仲方尚書為守璿其鄉人也

永嘉譜二十四卷

禮部侍郎郡人曹叔遠器遠撰曰年譜地譜名譜人譜時紹熙三年太守宛陵孫楫屬器遠哀集創為義例如此器遠庚戌進士蓋初第時也

永寧編十五卷

待制郡人陳謙益之撰漢分章安之東甌鄉為永寧今永嘉四邑是也故以名編時嘉定九年留元剛茂潛為太守

東陽志十卷

樞密鄱陽洪遵景嚴撰紹興二十四年

案文獻通考作紹興二十

四年此本作三十四年誤紹興止有三十二年也今改正

為通判時所作

括蒼志七卷

教授曾賁撰乾道六年太守四明樓璩叔韞序鑄之  
父也

括蒼志續一卷

郡人陳百朋撰

信安志十六卷

金方四ノ二  
教授衛玠撰太守四明劉垕也實嘉定己卯

信安續志二卷

教授葉汝明撰太守四明袁甫廣微紹定初也

建康志十卷

府帥史正志志道撰時乾道五年

建康續志十卷

府帥吳琚居父以郡人朱舜庸所編銓次與前志並  
行時慶元六年

六朝事迹二卷南朝宮苑記二卷

不知何人作記六朝故都事迹頗詳

姑孰志五卷

教授長樂林桷子長撰太守楊愿原仲也實淳熙五年

新安志十卷

通判贛州郡人羅愿撰時淳熙二年太守則趙不悔也

秋浦志八卷

太守南昌胡兆乾道八年修

秋浦新志十六卷

三山王伯大幼學以前志缺陋重修時以庾節攝郡

事端平丙申也

南康志八卷

郡守朱端章撰淳熙十二年

桐汭新志二十卷

教授錢塘趙子直撰紹熙五年也太守林棐序

案大獻通

考作紹  
定五年

豫章職方乘三卷後乘十二卷

郡人洪芻駒父宣和己亥撰乘取晉乘為名後乘淳  
熙十一年太守程叔達序

潯陽志十二卷

迪功郎晁百揆元采撰淳熙三年太守開封曹訓為  
之序



宜春志十卷

袁州教授南城童宗說修太守李觀民也

盱江志十卷續十卷

郡守胡舜舉紹興戊寅俾郡人童宗說黃敷忠為之  
續志慶元五年三山陳岐修亦郡守也

富川志六卷

軍學教授拈蒼潘廷立撰太守趙善宣紹熙四年也  
軍治永興本富川縣故名

南安志二十卷補遺一卷

太守方崧卿教授許開修

廣陵志十二卷

教授三山鄭少魏江都尉會稽姚一謙撰紹熙元年  
太守鄭興裔也

楚州圖經二卷

教授雪川吳莘商卿撰太守毗陵錢之望大受時淳

熙十三年

永陽志三十五卷

滁守林嶠命法曹龔維蕃修

吳陵志十卷

不著名氏淳熙壬寅所修後三年乙巳太守錢塘萬鍾元亨屬僚佐參正而刻之泰州在唐為吳陵縣

高郵志三卷續修十卷

興化縣主簿孫祖義撰郡守趙不慙刻之淳熙四五年間也其書在圖志中最為疏略嘉定中守汪綱再

修稍詳定矣

都梁志八卷

郡守霍麓教授周之瑞修紹熙元年也

續志一卷

嘉泰壬戌郡守耿與義序

案郡守以下原本闕  
今據文獻通考補

合肥志四卷

合肥主簿唐錡撰郡守鄭興喬也時淳熙十五年

同安志十卷

毗陵錢紳仲仲撰宣和五年太守曰曾元禮未幾而有狄難至紹興十三年太守張彥聲始取而刻之

歷陽志十卷

郡守九華程九萬鵬飛教授天台黃宜達之撰慶元元年

黃州圖經四卷附錄一卷

李宗諤祥符所修圖經亦頗有後人附益者郡守李詵又以近事為附錄焉詵參政邴漢老之子也

齊安志二十卷

郡守呂昭問俾教授厲居正重修慶元己未也

濠梁志三卷

郡守永嘉張季樗撰時嘉泰初元

無為志三卷

教授宋宜之纂太守柴瑾為之序

襄陽志四十卷

郡守朐山高夔命教授吳興劉宗幕官上蔡任汾編

纂為書既詳備而刊刻亦精緻圖志之佳者

襄沔記三卷

唐吳從政撰刪宗懔荆楚歲時記盛宏之荊州記鄒  
閱甫楚國先賢傳習鑿齒襄陽耆舊傳郭仲產襄陽  
記鮑堅南雍州記集成此書其紀襄漢事迹詳矣景  
龍中人自號棲閑子

房州圖志三卷

郡守毗陵陳宇撰

義陽志八卷

郡守河內關良臣撰紹熙二年也信陽軍唐申州所謂申光蔡吳元濟所據竭天下之力以取之者

長沙志五十二卷

郡守趙善俊以紹熙二年命教授褚孝錫等七人撰時陳止齋將漕相與考訂商略故序言當與長樂志並也

續長沙志十一卷



不著名氏錄紹興以後事

長沙土風碑一卷

唐潭州刺史河南張謂撰前有碑銘後有湘中記載

事迹七十件

衡州圖經三卷

郡守三山孫德輿行之撰嘉定戊寅刻

零陵志十卷

郡守徐自明嘉定己卯重修

春陵圖志十卷

教授臨江章穎茂憲撰淳熙六年太守趙汝誼

九疑考古二卷

道州崇道主簿吳致堯格甫撰取春陵志所紀而為

詩以記之宣和甲辰序

清湘志六卷

郡守永嘉陳峴壽南俾教授林瀛修

案大猷通考作林瀛原本誤作

灑今改正嘉泰二年也

武昌志三十卷

郡守括蒼王信成之命教授許中應等撰

武昌土俗編二卷

武昌令永嘉薛季宣撰記一縣之事頗詳紹興辛巳  
壬午間也其邑今為壽昌軍

鄖城志十二卷

教授傅巖撰慶元戊午太守李揖

岳陽志甲二卷乙三卷

甲集建安馬子嚴莊父乙集永嘉張聲道聲之所修  
皆郡守也

岳陽風土記一卷

宣德郎監商稅務建安危致明晦叔撰

案文獻通考作危致明

元符進士第二人仕至次對其在岳蓋謫官也

辰州風土記六卷

教授縉雲田渭伯清撰隆興二年郡守徐彭年

成都古今集記三十卷

知府事信安趙抃閱道撰清獻自慶歷將漕之後凡  
四入蜀知蜀事為詳故成此書熙寧七年也

續成都古今集記二十二卷

知府事王剛中居正撰寔紹興三十年余嘗手寫洛  
陽名園記而題其後曰晉王右軍聞成都有漢時講  
堂秦時城池門屋樓觀慨然遠想欲一遊目其與周  
益州帖蓋數致意焉近時呂太史有感於宗少文卧  
遊之語凡昔人紀載人境之勝錄為一編其奉祠毫

社也自以為譙沛真源恍然在目而究之太極嵩之  
宗福華之雲臺皆將臥遊之噫嘻弧矢四方之志高  
人達士之懷古今一也顧南北分裂蜀在境內雖遠  
患不往爾往則至矣毫兗嵩華視蜀猶邇封也欲往  
其可得乎然則太史之情其可悲也已余近得此記  
手寫一通與東京記長安河南志夢華錄諸書並藏  
而時自覽焉是亦臥遊之意云爾于時歲在己丑蜀  
故亡恙也後七年而有虜禍秦漢故跡焚蕩無遺今

其可見者惟此二記耳而板本亦不可復得矣嗚呼

悲夫 已丑實理宗紹定二年也後七年即理宗端

平三年丙申歲是年自九月二十九日夜沔利都統

兼關外四川安撫知沔州曹友聞戰死之後十二月

北兵入普州順慶潼川府破成都掠眉州五十四州

俱陷破獨夔州一路及瀘果合數州僅存友聞初以

明經登丙戌科繇谷縣尉制置桂如淵擢為天水教

授與田遂陳瑀俱招忠義官至員外郎自乞換武積

官至眉州防禦使左驍衛大將軍朝廷贈龍圖學士  
大中大夫賜廟褒忠謚曰節所部皆精銳虜畏之目  
為短曹遍身膽時人稱之曰元戎制勝世間有教授  
提兵天下無是役也北之主將統兵者四太子并達  
海也

蜀記二卷

唐鄭暉撰雜記蜀事人物古跡寺觀之屬未詳何人

梁益記十卷



著作佐郎益州知錄事參軍任弁撰天禧四年自為序

長樂志四十卷

府帥清源梁克家叔子撰淳熙九年序時永嘉陳傳良君舉通判州事大畧皆出其手

閩中記十卷

唐林諤撰本朝慶歷中有林世程者重修其兄世矩作序諤郡人養高不仕當大中時世程亦郡人也其

言永嘉之亂中原仕族林黃陳鄭四姓先入閩可以證閩人皆稱光州固始之妄

建安志二十四卷續志一卷

刪定官郡人林光撰慶元四年郡守永嘉張叔椿俾僚屬成之續志嘉定十二年府學士人所錄

清源志七卷

通判州事永嘉戴溪肖望撰時慶元己未太守信安

劉穎也

延平志十卷

郡守新安胡舜舉汝士與郡人廖拱廖挺裒集時紹興庚辰也序言與盱江志並行蓋其為建昌守亦嘗修圖志云

清漳新志十卷

司理參軍方杰撰嘉定六年太守趙汝諧贈中也

鄞江志八卷

汀州

郡守古靈陳昱日華俾昭武士人李臯為之時慶元

戊午郡有鄞江溪故名

莆陽志十五卷

郡守趙彥勵懋訓紹熙三年集郡士為之

武陽志十卷

教授葛元隲撰太守廖遲元達乾道六年也

晉江海物異名記三卷

祕書監莆田陳致雍撰致雍仕偽閩南唐後歸朝

廣州圖經二卷

教授王中行撰

南越志七卷

宋武康令吳興沈懷遠撰此五嶺諸書之最在前者也懷遠懷充之弟見宋書

番禺雜記一卷

攝南海主簿鄭熊撰國初人也莆田借李氏本錄之蓋承平時舊書末有河南少尹家藏六字不知何人也

桂林志一卷

靜江教授江文叔編時乾道五年張維為帥撰次疏  
略刊刻草率亦不分卷次

桂林風土記一卷

案唐書藝文  
志作三卷

唐融州刺史權知春州莫休符撰昭宗光化二年也  
桂海虞衡志二卷

府帥吳郡范成大至能撰范自桂移蜀道中追記昔  
游

高涼志七卷

教授莆田劉棠撰太守春陵義太初嘉泰壬戌也

邕管雜記一卷

庫部員外郎范旻撰旻國初宰相質之子嶺南初平旻知邕州兼轉運使

嶺外代答十卷

永嘉周去非直夫撰去非癸未進士至郡倅所記皆

廣西事

南方草木狀一卷

晉襄陽太守嵇含撰

黃巖志十六卷

知縣永嘉蔡範蓮甫撰嘉定甲申

旌川志八卷

知旌德縣歷陽李瞻伯山撰紹熙三年謝昌國為序

涇川志十三卷

知涇縣濡須王叔永撰嘉定癸酉趙南塘序之初



縣歲有水患庚午冬叔永改卜於舊治之東二里曰  
留村

新吳志二卷

知奉新縣盱江張國均維之撰新吳縣舊名嘉定甲  
戌

樂清志十卷

縣令信安袁采君載撰

脩水志十卷

分寧宰徐筠撰

連川志十卷

知連江縣豫章陶武克之撰嘉定乙亥

歷代宮殿名一卷

翰林承旨李昉等纂歷代及僭偽宮殿門闕樓觀園  
苑池館名無不畢錄

五嶽諸山記一卷

無名氏多鄙誕不經

王屋山記一卷

唐乾符三年道士李歸一撰

華山記一卷

不知名氏

西湖古跡事實一卷

錢塘進士傅牧撰以楊蟠百詠增廣共為一百八十

三首

案首字文獻  
通考作目

紹興壬午序

青城山記一卷

蜀道士杜光庭撰

茅山記一卷

嘉祐六年句容令陳倩修

幙阜山記一卷

案方輿勝覽寧州有幙阜山在分寧西百四十里此本誤作纂阜今改正

葛洪撰其山在豫章

豫章西山記一卷

贊皇李上文撰嘉祐丁酉歲

玉笥山記一卷

唐道士令狐見堯撰山在新塗別本又有南唐及本朝事後人所益也

湘中山水記三卷

晉耒陽羅含君章撰范陽盧拯注

案文獻通考作盧拯此本誤作盧極

今改正

其書頗及隋唐以後事則亦後人附益也

天台山記一卷

唐道士徐靈府撰元和中人也余假守臨海就使本道嘉熙丙申十月解郡符趨會稽治所道過之銳欲

往遊會大雪不果改轅由驛道至今以為恨偶見此  
記錄之以寄臥遊之意

顧渚山記一卷

唐陸羽鴻漸撰卿邦不貢茶久矣遺迹未必存也

廬山記五卷

屯田員外郎嘉禾陳舜俞令舉撰劉渙凝之李常公  
擇皆為之序令舉熙寧中謫居所作

續廬山記四卷

南康守廣陵馬玕錄山中碑記之文以續前錄

九華拾遺一卷

山居劉放至和二年自序曰滕天章作新錄於前沈  
太守撰總錄於後博考傳聞復得三十餘節

武夷山記一卷

杜光庭撰

羅浮山記一卷

廬陵郭之美撰皇祐辛卯序

霍山記一卷

知循州林須撰山在循州境內

鴈山行記一卷

永嘉陳謙撰嘉定己巳遊山直至絕頂得所謂鴈蕩者前人並未之識也然繼其後者亦未有聞焉

廬阜紀遊一卷

開封孫惟信李蕃撰嘗大雪登山至絕頂盡得其景物之詳嘉定初年也惟信能為詩詞善談詡蓋嘗有



官棄去不仕自號花翁遊江湖間人多愛之

何氏山莊次序本末一卷

尚書崇仁何異同叔撰其別墅曰三山小隱三山者  
浮石山巖石山玲瓏山其實一山也周回數里叙其  
景物次序為此編自號月湖標韻清絕如神仙中人  
膺高壽而終其山聞今蕪廢矣

湘江論一卷

案文獻通考作湘江  
此本訛作浙今改正

太常博士潘洞撰

海濤志一卷

唐竇叔蒙撰

太虛潮論一卷

永泰縣令錢棲業述末稱天祐六年

海潮圖論一卷

龍圖閣學士燕肅撰進

潮說一卷

知錢塘縣張君房撰凡三篇

西南備邊志十二卷

嘉州進士鄧嘉猷撰紹興末捷為有蠻擾邊初莫知其何種族也已而有能別識其為虛恨蠻者時蜀邊久無事既去而朝廷憂之詔諸司經度嘉猷取秦漢以來訖於本朝凡史傳所載蠻事皆著於篇時乾道中也其為志九為圖一

北邊備對六卷

程太昌撰淳熙中進禹貢圖孝廟因以北虜地里為

問對以虜無定居無文史不敢強言紹熙退居追米  
自古中華北狄樞紐相關者條列其地而推言之名  
曰備對

南北攻守類考六十三卷

監進奏院趙善譽撰進以三國六朝攻守之變鑒古  
事以考今地每事為之圖

六合掌運圖一卷

不著名氏凡為四十圖首列禹跡次為中興後南北

三境其後則諸邊關阨險要以及虜地疆界亦著之  
海外使程廣記三卷

南唐如京使章僚撰使高麗所記海道及其國山川  
事跡物產甚詳史虛白為作序稱已未十月蓋本朝  
開國前一歲也

大唐西域記十二卷

唐三藏法師元奘譯大總持寺僧辯機撰

契丹疆宇圖一卷

不著名氏錄契丹諸夷地及中國所失地

遼四京記一卷

亦無名氏曰東京中京上京燕京


高麗圖經四十卷

奉議郎徐兢明叔撰宣和六年路允迪傳墨卿使高麗兢為之屬歸上此書物圖其形事為之說今所刊不復有圖矣兢鉉之後善篆書亦能畫嘗自題保大騎省世家宣和書學博士又自號自信居士

諸蕃志二卷

福建提舉市舶趙汝适記諸蕃國及物貨所出

直齋書錄解題卷八



總校官庶吉士臣侍朝

校對官編修臣莫瞻菴

謄錄監生臣于世第